

Martxoaren 28an
JAUNAREN NEKALDIKO ERRAMU IGANDEA

Agurra

Aitaren eta Semearen, eta Espiritu Santuaren izenean. R/. Amen.

Jauna zuekin. R/. Eta zure espiriturarekin.

Sarrerako oharpena (*Batzarburuak berak*)

Senide maiteok: Garizumako aldi honetan bihotza prestatzen aritu gara penitentziaz eta maitasun-egintzez. Hurbil dugu Pazko-jaia. Jaunaren pazko-misterioari, hau da, haren nekaldiaren eta piztueraren misterioari, Eliza osoarekin bat eginik hasiera emateko ospakizuna egitera bildu gara gaur. Misterio hori betetzeko sartu zen Jauna Jerusalemgo hiri santuan. Ospa dezagun, beraz, fedez eta maitasunez, gu salbatzeko egin zuen sarrera horren oroitzapena, eta jarrai diezaiogun geure Jaunari, grazia lagun dugula haren gurutzean bat eginda, haren piztueran eta bizian ere bat egin dezagun.

Gaur gainera, Gipuzkoako Eliza guztietan, Caritasek gogora ekartzen dizkiogun behartsuen premiak gogoan izango ditugu eta horretarako emango dugu gure diru-laguntza eskuzabala.

Bedeinkapen otoitza

Ondoren eskuak bildurik otoitz hauetako bat egingo du.

**Jainko ahalguztidun betierekoa,
 bedeinka itzazu + erramu-adar hauek;
 eta egizu, Kristo Erregeari
 goraka eta kantari jarraitzen diogunok,
 haren bidez betiko Jerusalemara heldu gaitzezela.
 Errege bizi baita gizaldi eta gizaldietan.**

Edota:

Oi Jainko, indar ezazu Zugar uste on dutenen fedea eta entzun bihotz onez gure otoitzak: gaur Kristo garailea erramu-adarrekin goraiatzan dugunok, berarekin bat eginik, egintza onen fruituak eman ditzagun. Errege bizi baita gizaldi eta gizaldietan.

Ondoren (intsentsua erabiltzen bada liburua lurrinduz) Ebanjelioa hots egingo du.

Ebanjelioa

+ Jesu Kristoren Ebanjelioa San Markosen liburutik (11, 1-10)

Jerusalemera hurbildu zirenean, Oliamendi ondoko Betfage eta Betania herrixketara iritsirik, ikasleetako bi bidali zituen Jesusek, esanez: «Zoazte aurreko herrixka horretara; sartu orduko, astakume bat aurkituko duzue lotua, gainean oraindik inor jarri ez zaiona; askatu eta ekarri. Eta norbaitek zer ari zareten esaten badizue, erantzun: “Jaunak behar du; baina berehala itzuliko du bertara”».

Joan ziren, bada, eta han aurkitu zuten astakumea ate ondoan lotua, kanpoan kalean, eta askatzen hasi ziren. Bertan zeudenetako batzuek esan zieten: «Zer ari zarete astakumea askatzen?» Jesusek esana adierazirik, haiek astakumea eramaten utzi zieten.

Jesusi eraman zioten, eta beren jantziak astakumeari bizkarrean ezarri zizkieten, eta Jesus gainean eseri zen. Askok beren jantziak zabaldu zituzten bidean; beste batzuek, berriz, landetan ebakitako abarrak. Aurretik eta ondotik zihoazenek, hau zioten oihuka:

«Hosanna!

Bedeinkatua Jaunaren izenean datorrena!

Bedeinkatua datorren erreinua, gure aita Daviden erreinua!

Hosanna Goi-goikoari!»

Edota beste hau:

+ Jesu Kristoren Ebanjelioa San Joanen liburutik (12, 12-16)

Aldi hartan, jaietarako etorria zen jendetza handia, Jesus Jerusalemera zetorrela jakitean, palma-adarrak hartu eta bidera atera zitzaion eta oihuka hasi zen:

«Hosanna! Bedeinkatua Jaunaren izenean datorrena!
Bedeinkatua Israelgo erregea!»

Astotxo bat aurkiturik, gainean jarri zen Jesus, Liburu Santuak dioen bezala:

«Ez beldur izan, Sion hiria!
Hara, badatorkizu zeure erregea, astakume baten gainean eseria».

Ikasleak ez ziren orduan profetia honetaz jabetu; baina gero, Jesus goratua izan zenean, konturatu ziren Liburu Santuak dioen huraxe egin ziotela Jesusi.

Prozesioa

Ohargileak prozesiorako gonbidapena egin dezake hitz hauekin:

Erramu-adarrak eskuetan ditugula, Jesus goretsi zuen jendearen antzera, lagun diezaigun guk ere Jaunari, pozez kantari.

Damu-otoitza

Prozesiorik eta Sarrera Nagusirik egin ez denean bakarrik. Herria agurtu eta Damu-otoitza egingo da, eta ondoren kolekta-otoitza.

«Pazko festaburua baino sei egun lehenago, Jauna Jerusalemen sartzean, bidera atera zitzaizkion haurtxoak, palmadarrak eskuetan zituztela eta pozez oihuka: Hosanna zeru goienetan! Bedeinkatua Zu, erruki handiz gugana zatozen Hori!».

Jo dezagun guk ere Jaunarengana, eta eska diezaiogun Bere errukiz berri gaitzala Aste Santuaren hasiera honetan.

—Jesus Jauna, bekaturik izan ez arren geure bekatuen zama **hartu** zenuena: erruki, Jauna.

—Jesus Jauna, gure bekatuen barkamenarako gurutzean odola **isuri** zenuena: Kristo, erruki.

—Jesus Jauna, hilen artetik piztuz heriotza **garaitu** zenuena: Erruki, Jauna.

Erruki dakigula Jainko guztiz ahalsua, eta, gure bekatuak barkaturik, eraman gaitzala betiko bizira.

Otoitza

Aldarera iritsi eta agurtu ondoren, jarlekura joango da eta otoitza esango du:

**Jainko ahalguztidun betierekoa,
gizon-emakume guztiei apaltasun-bidea erakusteko,
gure Salbatzailea, giza haragia harturik,
gurutzean hiltzea nahi izan zenuen;
egizu, arren, har ditzagula gogoan
haren nekaldiko irakaspenak,
haren piztueran parte izan dezagun.
Zurekin eta Espiritu Santuarekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Bizia ematen dakien Jainkoaren irakaspenak gure itxaropena arnasberritzen du. Behertzen dakiena gertatuko da gizadiaren altxagarri eta heriotzatik piztuerara igarotzeko bide. Bera hitzak sendotzen gaitu.

Lehenengo irakurgaia (*Is 50, 4-7*)

Isaias profetaren liburutik

Jainko Jaunak hitz egiteko trebatu nau,
bihotz-eroriei adore-hitza esateko.

Goizero dit belarria ernearazten,
ikasle onak bezala entzun dezadan.

Jainko Jaunak belarria ireki dit,
eta nik ez diot aurka egin, ez atzera jo.

Bizkarra eskaini nien jotzen nindutenei,
masailak, bizarretik tiraka ari zitzaizkidanei.
Ez nien aurpegia saihestu irainei eta listuei.

Jauna dut laguntzaile;
horregatik, ez naiz kikildu;
horregatik gogortu dut aurpegia, harkaitza bezala,
bai baitakit ez naizela lotsagarri gertatuko.

Erantzun-salmoa (*Sal 22 [21] 8-9. 17-18a. 19-20. 23-24*)

Ni - re Jain - ko - a, nun zau - de Zu? No - la es - ku -
tik u - tzi nau - zu.

Ikusten nautenek burla egiten **di**date,
ezpainak okertuz, buruari **era**ginez:
«Jaunagana jo du, libra **de**zala!
Salba dezala, hainbeste maite **te** badu». R/.

Zakur-taldeak nau inguratzen,
gaizkile-multzoak erdian hartzen.
Esku-oinak zulatu dizkidate,
hezur guztiak zenbatu ditzaket. R/.

Nire jantziak banatzen dituzte,
nire soinekoa zotz egiten.
Baina Zu, Jauna, ez egon urrun!
Ene indar, zatoz laster ni laguntzera. R/.

Iragarriko diet zure izena neure senideei, ‘
goretsiko zaitut batzarraren erdian.
Goretsazue Jauna, begirune diozuenok;
ospa ezazue, Jakoberen ondorengo guztiok,
izan haren beldur, Israelen seme-alabok. R/.

Bigarren irakurgaia (*F/p 2, 6-11*)

San Paulo Apostoluak Filipoarrei egindako gutunetik

Kristo Jesusek, Jainkoaren izaera bereko izanik,
ez zion gogor eutsi Jainkozko bere mailari;
bestela baizik, zegokion aintza utzi
eta esklabo-izaera hartu zuen, gizakien antzeko eginez.
Eta gizaki bezala agertuz, apaldu egin zuen bere burua,
menpeko eginez heriotzaraino, gurutzean hiltzeraino.

Horregatik, denen gainera goratu zuen Jainkoak
eta izen guztietan bikainena eman zion,
Jesusen izenaren omenez denen belaunak makur daitezen,
zeruan, lurpean eta lurpean,
eta mingain guztiek aitoren deitzen Jesu Kristo dela Jauna,
Jainko Aitaren aintzarako.

Ebanjelio-aurreko gorapena (Ik. Flp 2, 8-9)

Je - su-kris- to gu - ri min-tza, ar - gi gu-re bi-ho - tza.

Kristo gugatik menpeko egin zen heriotzaraino,
gurutzeko heriotzaraino.

Horregatik Jainkoak goratu **egin** zuen,
eta izen guztien gaineko izena **eman** zion. R/.

Ebanjelioa (Mk 14, 1 – 15, 47)**Homiliarako argibideak**

Bedeinkatua, datorren Erreinua

Aste Santua hasten dugu, guretzat egiaz garrantzitsua den astea, Jesus gure Salbatzaileak gure salbamenerako egindakoa ospatzen baitugu. Jainkoaren maitasunak heriotza garaitzeko indarra duela ospatzen dugu. Jerusalem sartzean Errege aitortua izan zen Jesus (Mk 11, 1-10). Aste honetan bizituko duena, Jesusek berak aurreikusi zuen eta onartu ere bai askatasun osoz. Hots egin zuenaren ondorioa hura zen: **Jainkoaren Erregetzaren etorreraren** ondorioa. Erreinu hori estu-estu lotua dago Jesusen heriotza eta piztuerara.

Jesus nola agertu zen ikusi besterik ez dago: soldaduri gabe, herriaren ondo-ondoan, astakume baten gainean... zer nolako Erregea den garbi dago. Badirudi munduko erregeen eta hauen desfile handi-mandien parodia bat dirudi. Aste honetako Irakurgaietan ikusiko dugu Jainkoaren Erregetzaren moldea. Jesusek sarri hitz egin zuen honetaz bere predikuan, eta **aldaketa sakon**

bezala aurkeztu zuen: ez harremanetan eragin zezakeen aldaketa bakarrik, giza bihotzak aldatzeko indarra zuen aldaketa baizik.

Errege arraroa da Jesus. **Jainkoaren zerbitzari** moduan ageri da, ikasle bezala, Jainkoarekin harreman estua duen norbait bezala. Egunero entzuten du Jainkoaren hitza eta horregatik esan diezaioke hitz bizkorgarria nahiabetua dagoenari (*Is* 50, 4-7). Gertuko erregea da, beraz, jendea konfiantzaz gerturatzten zaio. Bere kontra daudenen jarrera ere garbi ikusten da, baina ez du horrek Jesus atzeratzen, badaki eta Jainkoa bere alde duela. Beste erregeak bere burua erakusten saiatzen diren bitartean bera obeditzen saiatzen da, apal eta leial. Gurutzeko heriotza, zitala da, gogorra, baina horrek eraman zuen Jesus aintzara, Aitaren ondora (*Flp* 2, 6-11).

Aste Santua hasten dugu eta azkenari begira gaude dagoeneko. Nekaldiaren irakurgaiak begi aurrean jarri digu gertakari guztia, bertan murgil gaitezen (*Mk* 14, 1 – 15,47). Ezin dugu nekaldia ikusle huts bagina bezala bizi, baizik eta kontakizunean barneratu behar dugu. Historia honen argumentuak **gu geu** kokatzen gaitu Jaunaren **ikasle** bezala. Lehenengo ikasleek bezala guk ere Jesusi jarraitu behar diogu, baina geuk ere ukatu eta saldu izan dugu hainbeste aldiz, bizkar eman diogu eta bakarrik utzi... Baina Jesusek gudan uste on du eta dei egiten digu gaur ere Bere salbamen mundura helarazteko. Eukaristia honek presta gaitzala salbamenaren misterioaren maitasuna eta onginahia ospatzeko.

Jainkoaren herriaren otoitza

Senideok: gurutzean Aitari otoitz egin zion Jesus Salbatzaileari eska diezaiozun gure alde eta gizaki guztien alde:

Erantzuna: Kyrie, eleison!



Ky-ri-e, Ky-ri-e, e - lei-son! Ky-ri-e, Ky-ri-e, e - lei - son!

- Gurutzean bere erasotzaileen alde otoitz egin zuen Jaunak, izan dezala erruki bekatu egin dutenentzat, eta adiskidetzearen bidetik eman diezaiela barkamena eta bakea. Egigun otoitz.
- Jesusen eskaintza izan dadila lagungarri ezjakintasunak, gogorik ezak, gaitzakeriak edota tentaldi orok Jainkoagandik urrundu dituenentzat. Egigun otoitz.
- Gurutzean bakardaderen tristura eta garraztasuna nozitu zituen Jaunak izan dezala kupida gaixoekin, atsekabetuekin eta zapalduekin, eta gure bihotzak ere horiei begira jar ditzan. Egigun otoitz.
- Lapur ona paradisuari hartu zuen Jaunak, eman diezagula guri ere bihotz-berritzeko gogoia eta har gaitzala egun batean bere bakezko erreinuan. Egigun otoitz.
- Garizumako bidean aurrera eginez bihotz-berrituak eta argituak iris gaitezen gertu ditugun Pazko jaietara. Egigun otoitz. R/.

Jainko ahalguztidun betierekoa, zeure Semea mundura bidali zenuen, bere nekaldiaz bekatua eta heriotza suntsitu eta bere piztueraz bizitza eta zorientasuna guri eskuratzeko; entzun zeure herri honen otoitzak, eta egizu goza ditzagula Jesu Kristoren gurutze aintzatsuaren fruituak. Errege bizi baita gizaldi eta gizaldietan.

Diru-bilketa egiten denean

Diru-bilketa Elizbarrutiko Caritasen beharretarako izango da .

Prefazioa

Erramu igandekoa, Meza-liburuan 219. or.

Jaunartze-ondorengo otoitza

**Zure misterio santuaz indarberiturik otoizka gaituzu, Jauna:
zure Semearen heriotzari esker,
sinesten dugun bizi betea itxarotea eman diguzun bezala,
emaguzu, haren piztueraz, bizi hori eskuratzea.
Errege bizi baita gizaldi eta gizaldietan.**

Bukaerako oharra

Bagoaz Jesusen eskutik. Aukera ugari izango dugu aste honetan Kristoren heriotza eta piztuera gertaberritzeko. Ahalegin berezia egin behar genuke guztiok larunbat santu gauean Kristoren Piztuera ospatzera biltzeko. Hori da, dudarik gabe, urteko elizkizun nagusia.

Herriaren gaineko otoitza eta bedeinkapena

Jauna zuekin. R/. Eta zure espirituarekin.

Makur zaitezte, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Begira, Jauna, zeure familia honi,
honengatik nahi izan baitzuen Jesu Kristo gure Jaunak
bere bizia gaizkileen eskuetan utzi
eta gurutzeko heriotza hartu.**

Errege bizi baita gizaldi eta gizaldietan. R/. Amen.

Bedeinka zaitzate! Jaingo ahalguztidunak:

Aitak, eta Semeak, + eta Espiritu Santuak. R/. Amen.

Zoazte Jaunaren bakean. R/. Eskerrak Jainkoari.